

# Ataqatigiissaarinnermut ataatsimiititaliat aamma ataqatigiissaarinnermi suleqatigiit pillugit kaajallaasitaq

Naalakkersuisut suleriaasiat pillugu Namminersorlutik Oqartussat nalunaarutaanni nr. 28, 13. juli 2022-meersumi § 1, imm. 4 naapertorlugu aalajangersarneqarpoq:

## *Naalakkersuisut naalakkersuinikkut sulinerannik ataqatigiissaarineq*

§ 1. Naalakkersuisut politikikkut sulinerannik ataqatigiissaarisussatut ataqatigiissaarinnermut ataatsimiititaliaq ataaseq aamma ataqatigiissaarinnermi suleqatigiit pingasut pilersinneqassapput.

*Imm. 2.* Ataqatigiissaarinnermut ataatsimiititaliaq aamma ataqatigiissaarinnermut suleqatigiit, naalakkersuinikkut akisussaaffinni assigiinngitsuni Naalakkersuisut naalakkersuinikkut anguniagaannik ataqatigiissaarineq suliasaraat.

*Imm. 3.* Suliat Naalakkersuisunut oqaluuserisassanngorlugit innersuunneqarnissaat sioqqullugu ataqatigiissaarinnermut ataatsimiititaliap aamma ataqatigiissaarinnermi suleqatigiit, naalakkersuinikkut suliani isumaqatigiittoqarneranik pilersitsiumalluni sukumiisunik aalajangersimasunik isumaliutersuuteqarnissaq, oqaloqatiginninnissaq naalakkersuinikkullu siumukarnissaq qulakkiissavaat.

*Imm. 4.* Naalakkersuisut Siulittaasuat naalakkersuinikkut suliat ataasiakkaat aalajangersimasut aaqqiiviginissaannut ataqatigiissaarinnermi suleqatigiikkallartussanik pilersitsisinnaavoq.

## *Ataqatigiissaarinnermut ataatsimiititaliaq*

§ 2. Naalakkersuisut ataqatigiissaagaasumik suliniuteqarnissaat aamma naalakkersuisooqatigiinnissamut isumaqatigiisummi siunnerfiit anguneqarnissaasa qulakkeernissaat, ataqatigiissaarinnermut ataatsimiititaliap suliasarai.

*Imm. 2.* Naalakkersuisut qitiusumik pingaartitaasa periusiukkamillu sammiveqarnerisa qulakkeernissaat, ataqatigiissaarinnermut ataatsimiititaliap aamma suliasaraa.

*Imm. 3.* Suliat naalakkersuinikkut aningaasaqarnikkulluunniit pingaarutilimmik ilusillit, matumani inatsisiliornermi isumaqatiginninniutissat annertuut, isumaqatigiissutit siunnersuutillu ilanngullugit, ataqatigiissaarinnermut ataatsimiititaliap suliarisarpai.

*Imm. 4.* Nalornisoqartillugu suliamik suliarinninnissaq ataqatigiissaarinnermut ataatsimiititaliamut imaluunniit ataqatigiissaarinnermut suleqatigiinnut ataatsimut innersuunneqassanersoq Naalakkersuisut Siulittaasuat aalajangiissaaq.

**§ 3.** Ataqtigiissaarinermut ataatsimiititaliap inuttarai:

- 1) Naalakkersuisut Siulittaasuat, ataqtigiissaarinermut ataatsimiititaliamut siulittaasuusoq.
- 2) Naalakkersuisut siulittaasuisa tullia aamma Aningaasaqarnermut Akileraartarnermullu Naalakkersuisoq.
- 3) Inussutissarsiornermut, Niuernermut, Aatsitassanut, Inatsisinik Atuutsitsinermut Naligiissitaanermullu Naalakkersuisoq.
- 4) Naalagaaffinngornissamut Nunanullu allanut Naalakkersuisoq.

*Ataqtigiissaarinermut suleqatigiit*

**§ 4.** Ataqtigiissaarinermut suleqatigiit ataasiakkaat akisussaaffeqarfinut tunngasuni naalakkersuisut siunnerfinik ataqtigiissaarneqarnissaasa qulakkeernissaat, ataqtigiissaarinermut suleqatigiit suliassaraat.

*Imm. 2.* Ataqtigiissaarinermut suleqatigiit akisussaaffeqarfimminni naalakkersuinikkut suliassanik suliaqartarput, matumani naalakkersuinikkut suliani, taakku ataqtigiissaarinermut ataatsimiititaliamut imaluunniit Naalakkersuisunut suliassatut innersuunneqarnissaat sioqqullugu, naalakkersuinikkut siuariartorerit atuuttunngortitsiniarlunilu isummersuutit pillugit isumaliutersuuteqarnissaq oqaloqatigiinnissarlu siunertaralugit.

*Imm. 3.* Ataqtigiissaarinermut suleqatigiit siulittaasumit ataatsimit aqunneqarput. Siulittaasooq Naalakkersuisut Siulittaasuannit toqqarneqartarpoq. Ataqtigiissaarinermut suleqatigiinni siulittaasut ataqtigiissaarinermut ataatsimiititaliamut attaveqartassapput.

*Imm. 4.* Ataqtigiissaarinermut suleqatigiit suliat ataqtigiissaarinermut ataatsimiititaliamut ingerlateqqillugit nassiuttassavaat, matumani isumaqtigiittoqarsinnaanngippat imaluunniit suliani ataqtigiissaarinermut ataatsimiititaliap akisussaaffinut tunngasuni, takuuk. § 2.

**§ 5.** Aningaasaqarnermut inuussutissarsiornermullu ataqtigiissaarinermut suleqatigiit, Naalakkersuisut aningaasaqarnermut naalakkersuinikkut anguniagaat kiisalu Naalakkersuisut inuussutissarsiornermut sanaartornermullu suliassaqaarfinni naalakkersuinikkut anguniagaat pillugit suliat suliarisarpai.

*Imm. 2.* Aningaasaqarnermut inuussutissarsiornermullu ataqtigiissaarinermut suleqatigiit makkuupput:

- 1) Naalakkersuisut siulittaasuisa tullia aamma Aningaasaqarnermut Akileraartarnermullu Naalakkersuisoq, ataqtigiissaarinermut suleqatigiinni siulittaasuvoq.
- 2) Inussutissarsiornermut, Niuernermut, Aatsitassanut, Inatsisinik Atuutsitsinermut Naligiissitaanermullu Naalakkersuisoq.
- 3) Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoq.
- 4) Ineqarnermut Attaveqaasersuutinullu Naalakkersuisoq.

**§ 6.** Inunnut ataqtigiissaarinermut suleqatigiit, atugarissaarnermut suliassaqaarfimmi Naalakkersuisut naalakkersuinikkut anguniagaat pillugit suliat suliarisarpai.

*Imm. 2.* Inunnut ataqtigiissaarinermut suleqatigiit makkuupput:

- 1) Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq, ataqtigiissaarinermut suleqatigiinni siulittaasuvoq..

- 2) Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq.
- 3) Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoq.
- 4) Peqqissutsimut Naalakkersuisoq.

**§ 7.** Pissuussutitut uumassusilinnut avatangiisinullu ataqatigiissaarinnermut suleqatigiit, Naalakkersuisut pinngortitamut, avatangiisinut, silap pissusaanut aamma inuussutissanut suliasaqarfimmi naalakkersuinikkut anguniagaat pillugit suliat suliarisarpai.

*Imm. 2.* Pissuussutitut uumassusilinnut avatangiisinullu ataqatigiissaarinnermut suleqatigiit makkuupput:

- 1) Naalagaaffinngornissamut Nunanullu Allanut Naalakkersuisoq, ataqatigiissaarinnermut suleqatigiinni siulittaasuvoq.
- 2) Aalisarnermut Piniarnermullu Naalakkersuisoq.
- 3) Nunalerinnermut, Imminut Pilersornermut, Nukissutitut Avatangiisinullu Naalakkersuisoq.

#### *Ataatsimiittarnerit*

**§ 8.** Ataqatigiissaarinnermut ataatsimiititaliaq aamma ataqatigiissaarinnermut suleqatigiit qaammammut ikinnerpaamik ataasiarlutik ataatsimiittarput, ilaasortanit pineqartunit peqataaffigineqartumik.

*Imm. 2.* Naalakkersuisunut ilaasortat, ataqatigiissaarinnermut ataatsimiititaliap aamma ataqatigiissaarinnermut suleqatigiit allat, ilaasortaaffiginngisamik ataatsimiinnerini pisariaqartitsineq malillugu peqataassinnaapput.

*Imm. 3.* Ataqatigiissaarinnermut ataatsimiititaliami aamma ataqatigiissaarinnermut suleqatigiinni ilaasortat ataasiakkaat aalajangissavaat, Naalakkersuisoq pineqartoq ikiorserumallugu naalakkersuisoqarfimmut pisortaq ataatsimiinnermi peqataassanersoq.

*Imm. 4.* Pisariaqartitsineq malillugu ataqatigiissaarinnermut ataatsimiititaliami aamma ataqatigiissaarinnermut suleqatigiinni immikkut ittumik ataatsimiinnissamut, ataqatigiissaarinnermut ataatsimiititaliamut aamma ataqatigiissaarinnermut suleqatigiinni ataasiakkaani siulittaasoq aggersaasinnaavoq.

**§ 9.** Ataqatigiissaarinnermut ataatsimiititaliamut aamma ataqatigiissaarinnermut suleqatigiinnut allattoqarfik Siulittaasup naalakkersuisoqarfianit isumagineqartarpoq.

*Imm. 2.* Ullormut oqaluuserisassanut immikkoortut, naalakkersuinikkut suliamik qulequtsikkat, ilanngunneqartut ataatsimiinnissap aalajangersarneqarsimasup aallartinnginnerani kingusinnerpaamik ullorsiutitigut ullut arfineq-marluk qaangiunneranni Siulittaasup naalakkersuisoqarfianut ingerlateqqillugit nassiunneqassapput, matumani ataqatigiissaarinnermut ataatsimiititaliami imaluunniit ataqatigiissaarinnermut suleqatigiinni ataatsimi siulittaasumut allatut aalajangersimasumik isumaqatigiittoqarsimanngippat.

*Imm. 3.* Ullormut oqaluuserisassat ataqatigiissaarinnermut ataatsimiititaliap imaluunniit ataqatigiissaarinnermut suleqatigiinni ataasiakkaani siulittaasumit, Siulittaasup naalakkersuisoqarfia suleqatigalugu aalajangersarneqartarput.

*Imm. 4.* Siulittaasup naalakkersuisoqarfia ataatsimiinnissap aallartinnginnerani ullorsiutitigut ullunik tallimanik sioqqutsisumik, ataqatigiissaarinnermut ataatsimiititaliami aamma ataqatigiissaarinnermut

suleqatigiinni ataasiakkaani ilaasortanut ullormut oqaluuserisassat nassiutissavai.

*Imm. 5.* Ataqatigiissaarinermut ataatsimiititaliami aamma ataqatigiissaarinermut suleqatigiinni ataatsimiinnerit aalajangiinerit pillugit imaqarniliaq suliarineqassaaq.

*Atuutilersitsinermut atorunnaarsitsinermullu aalajangersakkat*

**§ 10.** Kaajallaasitaq ulloq 1. oktobari 2024-mi atuutilissaaq.

*Imm. 2.* Peqatigisaanik ataqatigiissaarinermut ataatsimiititaliaq aamma ataqatigiissaarinermut suleqatigiinni pillugit kaajallaasitaq nr. 5, 2. septembari 2022-meersoq atorunnaarsinneqarpoq.

*Siulittaasup Naalakkersuisoqarfia, ulloq 2. septembari 2024*

**Múte Bourup Egede (atsior.)**

Naalakkersuisut Siulittaasuat

/ Hans-Peder Barlach Christensen (atsior.)

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut